

**Akileraaruserinermik ingerlatsineq pillugu
Inatsisartut inatsisaata allanngortinneqarneranik
Inatsisartut inatsisaat
(Nammineerluni nalunaarsuut kingusinaartumik
nassiunneqartillugu akileraarutissanut
qaffaassutissap allanngortinneqarnera. Akileraarutit
pillugit paasissutissanik nunallu allat
paarlaateqatigiittarnissaq.)**

§ 1

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi, Inatsisartut inatsisaatigut nr. 14, 22. november 2011-meersukkut kingullermik allanngortinneqartumi makku allannguutigittinneqassapput:

1. § 19, imm. 1-2, ima oqaasertaqassaaq:

"Nammineerluni nalunaarsuisussaataitaasup nammineerluni nalunaarsuut pissusissamisoortoq piffissaagallartillugu nassiussimanngippagu, akileraarutissat nammineerluni nalunaarsuummik nassiussinissamut piffissaliussap ullormik ataatsimik qimmorneqarneri tamaasa 200 kr.-inik qaffanneqassapput, taamaattorli innunut tunngatillugu katillugit annerpaamik 2.000 kr.-inik, aammalu namminersorlutik inuussutissarsiutinik ingerlataqartunut kiisalu inatsisit naapertorlugit inuttut isigineqarsinnaasunut tunngatillugu katillugit annerpaamik 5.000 kr.-inik.

Imm. 2. Immikkut pissutissaqartillugu akileraaruseriffiup qaffaammik imm. 1-imi taaneqartumik tamakkiisumik ilaannakortumilluunniit qaffaasoqannginnissaa nalunaarutigisinnaavaa."

2. § 35-p kingornanut ilanngunneqassaaq:

"§ 35 a. Aningaaseriviit qinnuigineqaaqqaanngikkaluarlutik, kontut pillugit paasissutissanik makkuninnga imaqartunik akileraaruseriffimmut ukiumoortumik nalunaaruteqartarnissaat Naalakkersuisut maleruagassiuussinnaavaat:

1) Ateq, najugaq, cpr-, cvr- imaluunniit IIN-normu aamma kinaanermut paasissutissatut nunani allani normut kiisalu kontoqartut kinaanerannik paasissutissat allat, aammalu taakku nunanut sumiiffinnnulluunniit sunut attuumassuteqarnerannik paasissutissat. Kontoqartunut inatsisit malillugit inuttut isigineqartunut, inummik ataatsimik inunnilluunniit arlaqartunik nakkutilliisoqartunut tunngatillugu aamma pineqartut tassaasinnaapput inuit nakkutilliisuusut kikkulluunniit pillugit paasissutissat taamaattut.

- 2) Kontup normua, kontulluunniit normua pigineqanngippat taassuma taamaaqataa alla siunertanut atussallugu naleqquttoq.
- 3) Aningaaserivup nalunaaruteqartup aqqa kinaaneranullu paasissutissatut normut, matumani aamma kinaanermut paasissutissatut normut nunat allat oqartussaasuinit atulersinneqarsimasut.
- 4) Aningaaserivimmi kontup imarisai nalingaluunniit, matumani aamma, sillimmasiineramik isumaqatigiissut aningaasanngorlugu nalilik imaluunniit taarsigassarsiat assigiiartumik taarsersorneqarnissaannik isumaqatigiissut pineqartilugu, qaammatisiutit malillugit ukiup pineqartup naanerani imaluunniit kontu qaammatisiutit malillugit ukioq naatinngu matusimappat matunnginnerani aningaasanngorlugu nalinga utertinneqarnerataluunniit nalinga.
- 5) Kontunut imaaliiallaannaq tiguneqarsinnaanngitsunik imaqartunut tunngatillugu:
- a) Kontumi pigisat pilersitaannik erniat tamarmiusut aningaasartaat, iluanaarutisiat tamarmiusut aningaasartaat aamma aningaasarsiat allat tamarmiusut aningaasartaat, aningaasat qaammatisiutit malillugit ukiup ingerlanerani kontumut akilernerqarsimappata ilanngunneqarsimappataluunniit imaluunniit kontu pillugu akilernerqarsimappata ilanngunneqarsimappataluunniit.
- b) Tunisinikkut imaluunniit nalilinnik aningaasanngortitsinikkut iluanaarutit tamarmiusut, qaammatisiutit malillugit ukiup ingerlanerani kontumut akilernerqarsimasut ilanngunneqarsimasulluunniit, aningaaserivik nalunaaruteqartuusoq tunisinermi aningaasanngortitsinermiluunniit kontoqartumut sinniisuusimappat.
- 6) Aallaqqaatitut akiliutinut kontunut sunulluunniit tunngatillugu erniat tamarmiusut aningaasartaat, qaammatisiutit malillugit ukiup ingerlanerani kontumut akilernerqarsimasut ilanngunneqarsimasulluunniit.
- 7) Kontunut sunulluunniit nr. 5-imi 6-imiluunniit pineqartunut ilaanngitsunut tunngatillugu aningaasat tamarmiusut, aningaaserivup nalunaaruteqartuusoq qaammatisiutit malillugit ukiup akiliiffigisassaata pisassanngortitsiffissaataluunniit ingerlanerani, kontoqartumut kontu pillugu akilernerqarsimasut pisassanngortinneqarsimasulluunniit, matumani ilanngullugit aningaasat aningaasanngortitsinikkut pissarsiarineqarsimajunnartut kontoqartumut qaammatisiutit malillugit ukiup ingerlanerani akilernerqarsimasut.

Imm. 2. Aningaaseriviit aningaaseriviit akiliiffigisimasamik erseqqinnerusumik taaneqartut aqqinik, taakkunungalu tamanut akiliutit taamaattut tamarmiusut aningaasartaannik aammattaaq nalunaaruteqartarnissaat Naalakkersuisut maleruagassiuussinnaavaat.

Imm. 3. Aningaaseriviit nalunaaruteqartussaataasut uppersaanerminni aningaaserivinnilu kontut kikkunnit pigineqarneri tak. imm. 1, aammalu aningaaserivinnut erseqqinnerusumik taaneqartunut akiliutit pillugit nalunaaruteqarnerminni peqqissaartumik periuseqarnissaat Naalakkersuisut maleruagassiuussinnaavaat, tak. imm. 2. Periusissanut taakkununga atatillugu aammattaaq nammineq nalunaajaateqartarnissaq Naalakkersuisut maleruagassiuussinnaavaat.

Imm. 4. Maleruagassat imm. 1-imiit 3-mut naapertorlugit atulersinneqarsimasut taamaallaat kontoqartunut aamma inatsisit naapertorlugit inuttut isigineqarsinnaasunut inunnik nakkutilliisoqartunut aammalu nunanut sumiiffinnulluunniit, marloriaammik akileraannginnissaq pillugu isumaqatigiissut, nunat tamat isumaqatigiissutaat alla naalagaaffilluunniit isumaqatigiissutaat imaluunniit allaffeqarfitsigoortumik isumaqatigiissut naapertorlugu akileraarutitigut suliassani ikioqatigiittarnissamik isumaqatigiissuteqarfigineqarsimasunut, aningaaserivinni kontut pillugit paasissutissanik imm. 1-imi 2-milu taaneqartunik ingerlaannartumik paarlaasseqatissanut attuumassuteqartunut, imaluunniit attuumassuteqarneq aalajangerneqarsinnaanngitsillugu atuuttuunissaat Naalakkersuisut aalajangersinnaavaat. Aammattaaq maleruagassat imm. 1-imi 2-milu taaneqartunit

piumasaqaatitakinnerusut Naalakkersuisut aalajangersarsinnaavaat, maleruagassallu assigiinngitsunik imaqartinneqarsinnaapput, kontoqartut imaluunniit inuit nakkutilliisuusut nunanut sumiiffinnulluunniit sunut attuumassuteqarnerat, aamma attuumassuteqarnerup aalajangerneqarsinnaannginnera apeqqutaatillugit. Nalunaaruteqartussaataitanerup atuutsikkiartuaarneqarnissaa aamma Naalakkersuisut maleruagassiuussinnaavaat.

Imm. 5. Aningaaseriviit aningaaserivinnut allanut akiliinerminni, pisussaaffiit Namminersorlutik Oqartussat aamma nunap sumiiffulluunniit pineqartup isumaqatigiissutaanni ilaatinneqartut eqquutsinniarlugit, nunanut allanut akileraarutit unerartissinnaavaat. Aningaaseriviit nunanut allanut akileraaruteqaataasussanik aningaaserivinnut allanut akiliisut akunnermiliuttuusulluunniit paasissutissanik, akiliuteqarnissaq sioqqullugu suliaqartussamut, akiliuteqarnermi taamaattumi unerartitsinissamut tamatuminngalu nalunaaruteqarnissamut pisarialinnik ingerlatitseqqittarnissaat Naalakkersuisut maleruagassiuussinnaavaat.

Imm. 6. Aningaaserivimmi kontumik pilersitsisup kontoqartut inuillu nakkutilliisuujunnartut cpr-, cvr- imaluunniit IIN-normui aamma kinaanermut paasissutissatut nunani allani normut pigineqarpata normut taakku aningaaserivimmut, maleruagassat erseqqinnerusut Naalakkersuisunit aalajangersarneqartut naapertorlugit nalunaarutigissavai kiisalu paasissutissat allat, kontoqartut inuillu nakkutilliisuujunnartut kinaanerinik paasissutissatut pisariallit tunniutissallugit. Kontut kingusinnerpaamik 31. december 2013-imi pilersinneqartut pillugit paasissutissanik imm. 1-imi taaneqartunik aningaaseriviit pissarsiniarnissamut, kontoqartullu aningaaserivinnut nalunaaruteqarnissamut pisussaaffi Naalakkersuisut maleruagassiuussinnaavaat.”

§ 2

Imm. 1. Inatsisartut inatsisaanni § 1, nr. 1 atuutilissaaq 1. januar 2015-imi.

Imm. 2. 2014-imut nammineeirluni nalunaarsuutit 2015-imi nassiunneqartussat Inatsisartut inatsisaanni pineqartunut ilaassapput.

Imm. 3. Inatsisartut inatsisaanni § 1, nr. 2 atuutilissaaq 1. juli 2014-imi.

Namminersorlutik Oqartussat, ulloq 8. juni 2014

Aleqa Hammond

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut